

佛說沙曷比丘功德經

西晉沙門釋法炬譯

聞如是一時佛在舍衛國祇樹給孤獨園時與千二百五十比丘菩薩萬人時須耶國有貧人行賃剃小兒頭所剃者皆約到麥熟當各雇麥一斛適別未遠道逢雇人將其還求麥欲以取酒飲之徧求無以麥還者於是便起恚意言願我壽終後作大神龍當陷此國後壽終鬼神遂還作龍其國中歷年風雨不時五穀毀敗佛念此國人民饑饉即遣沙曷比丘往化之龍見比丘往即興惡意欲敗國及殺沙曷比丘沙曷便變化鉢覆蓋一國龍雨之謂國已沒比丘以佛威神令龍見人民安隱如故龍復興恚意下雪比丘以鉢受之雪極比丘以手掃之著一處如山比丘乃入

龍室龍即出比丘復出龍入比丘復入如是若干輩龍極乃止長跪問言卿何神等惱我如此比丘言吾是佛弟子龍言我欲自歸於卿比丘答言吾有大師佛三界最尊卿當自歸之龍言佛在何所報言佛在舍衛國龍言乞逐道人去比丘言欲去者善便當六內龍著笏十七中人民見比丘取龍如是皆歡喜問言道人是何等大神降伏國患告言吾是佛弟子人民問言佛可得見不答言欲得見佛且須吾還時日向中道遇分衛人民或與飯者與酒者比丘受而食飲之致酒醉過樹下卧龍鉢架梁各在一處佛時笑五色光出阿難整衣服叉手白佛言佛不妄笑笑必有意佛告阿難汝爲見沙曷比丘不阿難言不見佛言今在彼樹下醉卧時千二百五十比丘菩薩萬

人各相與語言沙曷比丘已得阿羅漢何以復醉卧佛知諸人意有疑因說四事一者阿羅漢不三昧不得知二者不得便現神足三者不張強勸人分衛四者身中尚有蟲阿羅漢以是四事不及佛時萬菩薩皆迴意欲向羅漢佛遣目捷連往到沙曷比丘所勅之攝龍來龍以頭面爲佛作禮佛便爲說宿命本末龍心即解受五戒奉行十善即得須陀洹道爲佛作禮而去佛時說沙曷比丘功德微妙阿難叉手啓佛言沙曷比丘飲酒醉卧而佛說其功德微妙乃爾佛告阿難阿羅漢不復饑渴用三事故現醉卧耳一者佛欲開化菩薩意二者不欲逆布施家意三者恐諸弟子未得道者飲酒多失故以此至戒檢之沙曷比丘雖飲酒是爲不醉諸菩薩四輩弟子

聞佛說是皆起整衣服爲佛作禮沙曷比丘更前長跪白佛言須耶越國王人民欲見佛默然受之沙曷比丘即承佛教如彈指頃還到須耶越國國王人民見比丘皆歡喜有作禮者有跪者但又叉手者沙曷比丘告言佛明日當來到此王聞佛當來大歡喜豫於四衢道掃灑廣施帳幔佛明日與千二百五十比丘俱豫行空中有自然蓮華捧佛足下王及人民皆以香華出城迎佛五體投地稽首爲禮佛及比丘到宮即有自然師子座布以純紺七寶華蓋五色交絡五施設供養手自斟酌飯畢行盥水祝願佛爲王及人民說龍本末王與人民心解即受五戒行十善或得須陀洹者斯陀舍阿那舍阿羅漢者不可勝數佛說經竟四輩弟子天龍鬼神皆歡喜作禮

而去

佛說沙曷比丘功德經